

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97, 3/99 i 13/96 i “Službene novine Tuzlanskog kantona”, br. 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj dana 26.11.2008 godine, d o n o s i

## **Z A K O N**

### **O NABAVLJANJU, DRŽANJU I NOŠENJU ORUŽJA I MUNICIJE**

#### **DIO PRVI – UVODNE ODREDBE**

##### **Član 1.** **(Predmet)**

Ovim Zakonom se utvrđuju uslovi za nabavljanje, držanje i nošenje oružja i municije, oduzimanje oružja i municije, promet oružja i municije, popravljanje i prepravljanje oružja na području Tuzlanskog kantona.

##### **Član 2.** **(Primjena)**

(1) Oružje i municiju građani mogu nabavljati, držati i nositi samo po odredbama ovog Zakona.

(2) Odredbe ovog Zakona u pogledu nabavljanja, držanja i nošenja oružja i municije odnose se i na strane državljane i lica bez državljanstva kojima je odobreno stalno nastanjenje na teritoriji Bosne i Hercegovine.

##### **Član 3.** **(Izuzeci u primjeni)**

Odredbe ovog Zakona ne odnose se na pripadnike oružanih snaga, na policijske službenike, službenike sudske policije, pripadnike straže kazneno-popravnih ustanova, zaposlenike Obavještajno-sigurnosne agencije Bosne i Hercegovine, kada drže i nose oružje i municiju po propisima svoje službe.

##### **Član 4.** **(Primjena ZUP-a)**

Na sva pitanja postupka, koja nisu uređena ovim Zakonom, primjenjuju se odredbe Zakona o upravnom postupku.

##### **Član 5.** **(Oružje)**

(1) Kao oružje u smislu ovog Zakona smatra se:

- a) vatreno oružje,
- b) vazdušno oružje,
- c) gasno oružje,
- d) oružje za signalizaciju,

- e) rasprskavajuće oružje i
- f) hladno oružje.

(2) **Vatreno oružje** su sve vrste pušaka, pištolja i revolvera, kao i sve vrste naprava koje pod pritiskom barutnih gasova izbacuju kroz cijev zrno, kuglu, sačmu ili druge projekte. Vatreno oružje je kratko ili dugačko vatreno oružje koje može biti s repetirajućim mehanizmom, poluautomatsko ili automatsko.

(3) **Vazdušno oružje** su sve vrste pušaka, pištolja, revolvera i druge naprave koje pod pritiskom vazduha izbacuju kroz cijev zrno, kuglicu ili druge projekte.

(4) **Gasno oružje i oružje za signalizaciju** su puške, pištolji i revolveri i druge naprave koje pod pritiskom gasova raspršuju nadražljive tvari, odnosno ispaljuju punjenje namijenjeno isključivo izazivanju glasnog pucanja ili ispaljivanju svijetleće signalne zvjezdice.

(5) **Rasprskavajuće oružje** su sve vrste bombi, mina, granata i drugih naprava opremljenih sa eksplozivnom materijom ili detonarotom (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja.

(6) **Hladno oružje** su bodeži, kame, mačevi, sablje, bajoneti i skakavci čije se sječivo nalazi pod pritiskom sabijene opruge, a iz drške iskaču pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, buzdovani, te druga oružja sa skrivenim oštricama. Hladnim oružjem smatraju se i predmeti pogodni za nanošenje povreda, kada se nose na mjestima utvrđenim članom 27. ovog Zakona.

## **Član 6.**

### **(Dijelovi za vatreno i vazdušno oružje)**

Kao dijelovi za vatreno i vazdušno oružje, u smislu ovog Zakona, smatraju se cijevi za puške i pištolje, ulošci – adapteri sa olučenim cijevima za puške, sa neolučenim cijevima i zatvarači, kao i drugi dijelovi koji su označeni fabričkim brojem.

## **Član 7.**

### **(Municija)**

Pod municijom za vatreno oružje, u smislu ovog Zakona, podrazumijeva se cjelovit metak koji sjedinjuje čahuru, kapislu, barutno punjenje i zrno ili sačmu. Ne smatra se municijom metak bez zrna, kugle ili sačme, punjenje za industrijske naprave i naprave za uspavljivanje životinja i metak za gasno, odnosno signalno oružje.

## **Član 8.**

### **(Značenje izraza)**

Pojedini izrazi, upotrijebljeni u ovom Zakonu, imaju sljedeća značenja:

a) **lovačko oružje** čine lovačke puške, puške raznih kalibara sa olučenim i neolučenim cijevima (puške sa repetirajućim mehanizmom i poluautomatske puške, kojima nije zabranjeno loviti divljač),

b) **sportsko oružje** čine pištolji i revolveri velikog kalibra, malokalibarske puške i malokalibarski pištolji i revolveri, kalibra 5,6 mm, sa ivičnim paljenjem i sa olučenim i neolučenim cijevima, vazdušne puške i vazdušni pištolji i druga sportska oružja,

c) **trofejno oružje** je vatreno i hladno oružje koje se čuva kao uspomena ranijeg perioda historije Bosne i Hercegovine; odredbe ovog Zakona o trofejnom oružju primjenjuju se i na vatreno i vazdušno oružje koje je od strane ovlaštene organizacije onesposobljeno za upotrebu i hladno oružje koje za njihovog vlasnika predstavlja ličnu ili porodičnu uspomenu,

d) **staro oružje** su duge i kratke puške, kubure i druge vrste oružja za koje se više ne proizvodi municija, koje imaju historijsku ili umjetničku vrijednost ili služe za umjetničke, kulturne i druge slične priredbe, ili čine sastavni dio narodne nošnje i koje je od strane ovlaštene organizacije ili ovlaštenog pojedinca onesposobljeno za upotrebu, kao i sablje, mačevi i sl.,

e) **oružje za uspavlivanje životinja** je oružje koje se upotrebljava u svrhu držanja, čuvanja i zaštite životinja, naučnog istraživanja i prikupljanja stručnih podataka,

f) **automatsko oružje** je oružje kod kojeg je jednokratnim pritiskom na obarač moguće ispaliti više metaka,

g) **poluautomatsko oružje** je oružje koje je nakon ispaljivanja svakog metka ponovo spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak,

h) **kratko vatreno oružje** je oružje čija cijev nije duža od 30 cm, a ukupna dužina ne prelazi 60 cm,

i) **sprej za omamljivanje** je naprava kojom se usmjereno izbacuju u vidu mlaza ili pjene neškodljive nadražljive tvari za onesposobljavanje pojedinca i koje na ljudsko zdravlje imaju kratkotrajan učinak,

j) **snajper** je optički nišan za oružje,

k) **registrovano oružje** je oružje za koje je izdato odobrenje za držanje oružja ili oružni list,

l) **vlasnik oružja** je fizičko i pravno lice, koje posjeduje registrovano oružje,

m) **ovlašteni trgovac oružjem** je pravno lice koje je, u skladu sa ovim Zakonom, ovlašten za promet oružja i municije,

n) **zajednički korisnici oružja** su lica koja koriste jedno isto lovačko ili sportsko oružje.

## DRUGI DIO – NABAVLJANJE, DRŽANJE I NOŠENJE ORUŽJA I MUNICIJE

### Član 9.

#### (Odobrenje za nabavljanje oružja i municije)

(1) Vatreno i vazdušno oružje, municija za puške sa olučenim cijevima, pištolji i revolveri mogu se nabavljati samo na osnovu odobrenja policijske uprave Ministarstva unutrašnjih poslova Tuzlanskog kantona na čijem području podnosilac zahtjeva ima prebivališe, odnosno sjedište (u daljem tekstu: nadležna policijska uprava). Načelnik nadležne policijske uprave će formirati komisiju od tri člana, koja će cijeniti opravdanost zahtjeva za dobijanje odobrenja za nabavku oružja i municije i najmanje jedanput godišnje obavještavati policijskog komesara i ministra unutrašnjih poslova Tuzlanskog kantona (u daljnjem tekstu: ministar) o načinu rješavanja zahtjeva za nabavljanje oružja i municije.

(2) Dijelovi za oružje iz prethodnog stava sa označenim fabričkim brojem mogu se nabavljati na osnovu odobrenja nadležne policijske uprave, i to samo za oružje za koje je izdat oružni list.

(3) U slučaju zamjene tehnički ispravnih dijelova, zamijenjene tehnički ispravne dijelove vatreneog i vazdušnog oružja koji se označavaju fabričkim brojem, imaoci oružja dužni su predati nadležnoj policijskoj upravi koja će o tome izdati potvrdu, a sa preuzetim dijelovima postupit će u skladu sa odredbama člana 40. ovog Zakona.

(4) Odobrenje za nabavljanje lovačkog oružja i municije može se izdati samo licu koje je položilo lovački ispit i član je lovačke organizacije.

(5) Izuzetno od odredbe stava (4) ovog člana, odobrenje za nabavljanje lovačkog oružja može se izdati i licu kome je držanje i nošenje takvog oružja neophodno radi zaštite imovine u

ličnoj svojini (stada, usjev i sl.), kao i streljačkim organizacijama radi upražnjavanja streljačkog sporta.

(6) Odobrenje za nabavljanje sportskog oružja i municije može se izdati samo streljačkim organizacijama i njihovim članovima.

(7) Odobrenje po odredbama stavova (1), (2), (4), (5) i (6) ovog člana važi šest mjeseci od dana uručenja.

(8) Oružje, kao i dijelove za oružje, može nabaviti samo lice na čije ime odobrenje glasi.

(9) Odobrenje za nabavljanje municije može se izdati samo za oružje za koje je licu izdat oružni list, odnosno odobrenje za držanje oružja.

(10) Izuzetno od odredbi stavova (1) i (6) ovog člana, streljačke organizacije i članovi streljačkih organizacija, u sportske svrhe, mogu nabavljati vazdušno oružje bez odobrenja, a dužni su, u roku od osam dana, nabavku tog oružja prijaviti nadležnoj policijskoj upravi koja o tome vodi odgovarajuću evidenciju.

### **Član 10.**

#### **(Zabrana nabavljanja, držanja, nošenja, popravljanja, prepravljanja i prometa)**

(1) Zabranjeno je nabavljanje, držanje, nošenje, popravljanje i prepravljanje vatrenog, hladnog i gasnog oružja, ukoliko ovim Zakonom nije drugačije određeno:

- a) automatskog oružja,
- b) dugog poluautomatskog oružja, izuzev lovačkog oružja,
- c) vatrenog oružja bez označene marke, kalibra i fabričkog broja,
- d) oružja sa integralnim prigušivačem, prigušivača namijenjenih oružju i dijelova za prigušivače,
- e) oružja koje je namijenjeno izbacivanju eksplozivnih projektila,
- f) oružja koje ima oblik predmeta druge namjene, tako da po svome vanjskom izgledu nije prepoznatljivo kao oružje,
- g) rasprskavajućeg oružja,
- h) gasnog oružja, izuzev spreja za omamljivanje,
- i) hladnog oružja i
- j) municije čija je osnovna namjena probijanje oklopa, municije sa eksplozivnim, zapaljivim ili otrovnim projektilima.

(2) Zabranjen je promet oružjem i napravama iz stava (1) ovog člana.

### **Član 11.**

#### **(Oružni list)**

(1) Za držanje i nošenje oružja fizičkom licu izdaje se oružni list. Oružni list izdaje nadležna policijska uprava.

(2) Imalac oružja dužan je, kada drži ili nosi oružje, imati uz sebe oružni list izdat za to oružje i na zahtjev policijskih službenika i drugih ovlaštenih službenih lica Ministarstva unutrašnjih poslova Tuzlanskog kantona (u daljnjem tekstu: Ministarstvo), omogućiti uvid u to oružje i oružni list.

(3) Municija za puške sa neolučenim cijevima i za vazdušno oružje može se nabavljati na osnovu oružnog lista izdatog za to oružje.

(4) Izdavanje oružnog lista ne može se odbiti licu kome je izdato odobrenje za nabavljanje oružja, osim u slučajevima predviđenim ovim Zakonom.

(5) Na isto lovačko ili sportsko oružje mogu se izdati oružni listovi za najviše tri lica.

(6) Oružni list izdaje se sa rokom važnosti od 10 godina.

(7) Imalac oružja može, u roku od 60 dana od dana isteka roka iz stava (6) ovog člana, podnijeti zahtjev za produženje važnosti oružnog lista nadležnoj policijskoj upravi, uz koji prilaže dokaze da je oružje ispravno, da ispunjava uslov u pogledu zdravstvene sposobnosti za držanje i nošenje oružja, a za lovačko i streljačko oružje i dokaz da je član lovačke i streljačke organizacije. Nadležna policijska uprava utvrđuje da li imalac oružja ispunjava uslove propisane u članu 20. stav (1) tačke b), c), d) i e) ovog Zakona.

(8) Ukoliko u roku iz stava (7) ovog člana ne podnese zahtjev za produženje važnosti oružnog lista, ili ne ispunji uslove iz stava (7) ovog člana, imalac oružja je dužan nakon isteka navedenog roka oružje, municiju i oružni list predati nadležnoj policijskoj upravi, koja je u svakom slučaju, istekom propisanog roka od 60 dana, obavezna donijeti rješenje o oduzimanju oružja, municije i oružnog lista, te postupiti u skladu sa članom 38. ovog Zakona.

(9) Obrazac i sadržaj obrasca oružnog lista, na prijedlog policijskog komesara, propisuje ministar,

(10) Protiv rješenja o oduzimanju iz stava (8) ovog člana može se izjaviti žalba Ministarstvu u roku od 15 dana od dana prijema rješenja.

### **Član 12. (Trofejno oružje)**

(1) Za držanje trofejnog oružja potrebno je odobrenje koje izdaje nadležna policijska uprava.

(2) Zabranjeno je nositi i upotrebljavati trofejno oružje i za ovo oružje nabavljati i držati municiju.

(3) Nadležna policijska uprava će odbiti zahtjev za izdavanje odobrenja iz stava (1) ovog člana licu kod kojeg postoji neka od smetnji iz člana 20. ovog Zakona.

### **Član 13. (Staro oružje)**

(1) Staro oružje može se nabaviti, držati i nositi bez odobrenja i oružnog lista.

(2) Lice koje se bavi sakupljanjem starog oružja mora imati za to odobrenje nadležne policijske uprave.

(3) Zabranjeno je upotrebljavati staro oružje kao oružje i za ovo oružje nabavljati, spravljati i držati municiju.

(4) Vlasnik starog oružja dužan je to oružje prijaviti nadležnoj policijskoj upravi.

### **Član 14. (Vazdušno oružje koje nabavljaju streljačke organizacije i članovi streljačkih organizacija, oružje za signalizaciju, sprejevi za omamljivanje i oružje za uspavlivanje životinja)**

(1) Vazdušno oružje koje nabavljaju streljačke organizacije i članovi streljačkih organizacija, oružje za signalizaciju i sprejevi za omamljivanje mogu se nabaviti, držati i nositi bez odobrenja i oružnog lista.

(2) Lice može nabaviti, držati, nositi, i upotrijebiti sprej za omamljivanje isključivo u samoodbrani.

(3) Vlasnik oružja iz stava (1) ovog člana, dužan je nabavku oružja, izuzev spreja za omamljivanje, u roku od osam dana, prijaviti nadležnoj policijskoj upravi koja o tome vodi odgovarajuću evidenciju,

(4) Članovi streljačkih organizacija dužni su, prilikom nošenja vazdušnog oružja, imati i potvrdu i člansku kartu izdatu od strane streljačke organizacije,

(5) Oružje za uspavljivanje životinja može se nabaviti, držati i nositi na osnovu odobrenja koje izdaje nadležna policijska uprava pravnim licima koja imaju registrovanu djelatnost za uzgoj, držanje, čuvanje ili zaštitu životinja,

(6) Pravna lica iz stava (5) ovog člana, rukovanje i korištenje oružja mogu povjeriti samo punoljetnim licima koja ispunjavaju uslove propisane članom 20. stav (2) tačke b), c), d) i e) i stav (3) ovog Zakona,

(7) Oružje iz stava (1) ovog člana mogu nabavljati, držati i nositi samo lica starija od 18 godina, izuzev spreja za omamljivanje.

### **Član 15. (Snajper)**

(1) Lice, streljačka organizacija i organizacija koja gazduje lovištem, koji nabave snajper, dužni su da to prijave nadležnoj policijskoj upravi odmah, a najkasnije u roku od 10 dana od dana nabavljanja.

(2) Lice, streljačka organizacija i organizacija koje gazduje lovištem, dužni su prijaviti otuđenje, nestanak ili gubljenje snajpera odmah, a najkasnije u roku od 10 dana od dana otuđenja, nestanka ili gubljenja snajpera, odnosno od dana kada su saznali za otuđenje, nestanak ili gubljenje snajpera.

(3) Nadležna policijska uprava vodi evidenciju o snajperima koje drže pojedinci, streljačke organizacije i organizacije koje gazduju lovištima.

(4) Bliže propise o vođenju evidencije iz stava (3) ovog člana, na prijedlog policijskog komesara, donosi ministar.

### **Član 16. (Postupak u slučaju smrti imaoca oružja)**

(1) U slučaju smrti imaoca oružja, član njegove porodice ili drugo lice koje je s njim živjelo u zajednici, dužno je da u roku od 60 dana od dana smrti imaoca oružja, a na zahtjev nadležne policijske uprave i prije isteka tog roka, predati na čuvanje toj policijskoj upravi oružje, municiju i oružni list, odnosno dozvolu za držanje trofejnog oružja.

(2) Licu koje naslijedi oružje iz stava (1) ovog člana, na njegov zahtjev, nadležna policijska uprava izdat će oružni list, odnosno odobrenje za držanje trofejnog oružja, ukoliko ispunjava uslove iz člana 20. ovog Zakona. Ako se oružni list, odnosno odobrenje za držanje oružja ne izda, nadležna policijska uprava postupit će u skladu sa odredbama članova 38. i 40. ovog Zakona.

### **Član 17. (Obaveza prijavljivanja nabavke oružja)**

(1) Fizičko lice i pravna lica kojima je izdato odobrenje za nabavljanje oružja, dužni su u roku od osam dana od dana izvršene nabavke oružja podnijeti pismeni zahtjev nadležnoj policijskoj upravi, radi registracije oružja i izdavanja oružnog lista.

(2) Fizičko lice i pravna lica, kojima je izdato odobrenje za nabavljanje oružja, a oružje nisu nabavili u roku od šest mjeseci od dana uručenja odobrenja, dužni su vratiti odobrenje za nabavljanje oružja u roku od osam dana od dana proteka roka, nadležnoj policijskoj upravi koja je izdala odobrenje.

### **Član 18.** **(Zamjena vatrenog oružja)**

(1) Zamjena vatrenog oružja može se izvršiti samo ako oružni listovi glase na istu vrstu vatrenog oružja.

(2) Lice koje zamijeni oružje dužno je da, u roku od osam dana od dana kada je zamjenu izvršilo, o tome obavijesti nadležnu policijsku upravu i da podnese zahtjev za izdavanje novog oružnog lista.

### **Član 19.** **(Prenos prava svojine, korištenja i raspolaganja)**

(1) Fizičko lice i pravna lica, kojima je izdato odobrenje za držanje oružja, ne mogu prenijeti pravo svojine na vatreno i vazdušno oružje licu ili organizaciji iz člana 15. ovog Zakona, koji nemaju odobrenje za nabavku odnosno vrste oružja.

(2) Vlasnik oružja koji je prenio pravo svojine na oružju dužan je odmah, a najkasnije u roku od osam dana, predati nadležnoj policijskoj upravi oružni list, odnosno odobrenje za držanje oružja i priložiti primjerak odobrenja za nabavku oružja izdatog licu, odnosno organizaciji iz stava (1) ovog člana, na koje se prenosi pravo svojine.

### **Član 20.** **(Opšti i posebni uslovi za izdavanje odobrenja za nabavljanje oružja)**

(1) Nadležna policijska uprava izdat će odobrenje za nabavljanje oružja licu, ukoliko ispunjava opšte i posebne uslove.

(2) Opšti uslovi za izdavanje odobrenja za nabavljanje oružja su:

- a) da je navršilo 21 godinu života,
- b) da ima opravdani razlog za nabavljanje oružja,
- c) da nije osuđen za krivično djelo, osim za krivična djela protiv bezbjednosti javnog saobraćaja,
- d) da se protiv njega ne vodi istraga ili krivični postupak, osim za krivična djela protiv bezbjednosti javnog saobraćaja i
- e) da nije u posljednje dvije godine kažnjeno za prekršaj protiv javnog reda i mira, odnosno za prekršaj propisan Zakonom o nabavljanju, držanju i nošenju oružja i municije, kao i za vrijeme dok se protiv tog lica vodi postupak za takve prekršaje.

(3) Posebni uslovi za izdavanje odobrenja za nabavljanje oružja su:

- a) da je na zdravstvenom pregledu utvrđeno da je zdravstveno sposoban za držanje i nošenje oružja i
- b) da raspolaže tehničkim znanjem za pravilno rukovanje oružjem i da poznaje propise koji se odnose na držanje i nošenje oružja.

### **Član 21.** **(Utvrđivanje uslova za izdavanje odobrenja za nabavljanje oružja)**

(1) Nadležna policijska uprava utvrdit će da li su ispunjeni uslovi iz člana 20. stav (2) tačke a), b), c), d) i e).

(2) Podnosioca zahtjeva koji ispunjava uslove iz člana 20. stav (2) tačke a), b), c), d) i e), nadležna policijska uprava, ako utvrdi da nema osnova za odbijanje zahtjeva u skladu sa članom 22. stav (1), uputit će da u roku od 60 dana dostavi dokaze o ispunjavanju uslova iz člana 20. stav (3) tačke a) i b),

(3) Postojanje uslova iz člana 20. stav (3) tačke a) dokazuje se uvjerenjem o zdravstvenoj sposobnosti koje izdaju zdravstvene organizacije koje su ovlaštene za obavljanje takvih zdravstvenih pregleda.

(4) Postojanje uslova iz člana 20. stav (3) tačka b) dokazuje se:

- a) za lovačko oružje – potvrdom o položenom lovačkom ispitu,
- b) za sportsko oružje – potvrdom sportske streljačke organizacije i
- c) za kratko vatreno oružje – potvrdom o osposobljenosti za pravilno rukovanje, držanje i nošenje oružja koju izdaje Komisija.

(5) Komisiju za ocjenu osposobljenosti za pravilno rukovanje, držanje i nošenje oružja imenuje ministar.

(6) Izuzetno od stava (4) ovog člana, lice iz člana 3. ovog Zakona, za vrijeme aktivne službe ili nakon odlaska u penziju, postojanje uslova iz stava (4) tačka c) ovog člana dokazuje ispravom o zaposlenju, odnosno o prestanku radnog odnosa zbog ispunjavanja uslova za penziju.

(7) Program, način i troškove osposobljavanja za slučajeve iz stava (4) tačka c) ovog člana, donosi ministar.

(8) Ako podnosilac zahtjeva ne ispuni jedan od opštih i posebnih uslova iz člana 20. nadležna policijska uprava odbit će zahtjev za izdavanje odobrenja.

(9) Protiv rješenja nadležne policijske uprave može se izjaviti žalba Ministarstvu.

(10) Rješenje Ministarstva je konačno i protiv istog se ne može voditi upravni spor.

## **Član 22.**

### **(Interesi javnog reda i mira i bezbjednosti)**

(1) Nadležna policijska uprava odbit će zahtjev za izdavanje odobrenja za nabavljanje oružja ili municije, ako to nalažu interesi javnog reda i mira, odnosno interesi bezbjednosti.

(2) Interese javnog reda i mira, odnosno interese bezbjednosti iz stava (1) ovog člana, nadležna policijska uprava cijeni na osnovu okolnosti koje ukazuju da bi oružje moglo biti zloupotrebjeno, naročito uzimajući u obzir uživanje narkotičkih sredstava, češće i prekomjerno uživanje alkohola, teže poremećene porodične odnose, susjedске odnose i odnose na radnom mjestu i disciplinske povrede propisa o lovstvu ili sportskom streljaštvu.

(3) Policijski službenik Ministarstva ovlašten je tražiti i prikupljati podatke i informacije od građana, radi utvrđivanja uslova iz stava (2) ovog člana, o čemu sačinjava službenu zabilješku.

(4) Protiv rješenja nadležne policijske uprave može se izjaviti žalba Ministarstvu.

(5) Rješenje Ministarstva je konačno i protiv istog se ne može voditi upravni spor.

## **Član 23.**

### **(Ograničenje u nabavljanju pištolja i revolvera)**

Fizičko lice može imati najviše jedan pištolj i jedan revolver, za koje mu je izdat oružni list, izuzev članova streljačkih organizacija.

## **Član 24.**

### **(Oduzimanje odobrenja)**

(1) Odobrenje za nabavljanje oružja ili municije oduzet će se ako poslije izdavanja odobrenja nastupi neki od razloga iz člana 20. stav (2) tačke b), c), d) i e) i stav (3) tačka a) ovog Zakona.

(2) Oružni list neće se izdavati ako poslije izvršene nabavke oružja nastupi neki od razloga iz člana 20. stav (2) tačke b), c), d) i e) i stava (3) tačka a) ovog Zakona.



(3) O oduzimanju odobrenja za nabavljanje oružja ili municije, nadležna policijska uprava donosi rješenje protiv kojeg se može izjaviti žalba Ministarstvu u roku od 15 dana od dana prijema rješenja.

### **Član 25.** **(Postupanje sa oružjem i municijom)**

- (1) S oružjem i municijom mora se postupati s naročitom pažnjom.
- (2) Naročita pažnja u postupanju s oružjem i municijom pokazuje se u njegovom pravilnom čuvanju, pravilnom, stručnom i pažljivom rukovanju, nošenju, prenošenju i držanju u ispravnom stanju.
- (3) Građani su dužni pridržavati se pravila javno istaknutih zabrana o unošenju oružja u određene prostore ili prostorije.
- (4) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava, odnosno u takvom stanju da nije u mogućnosti shvatiti značenje svojeg postupanja, odnosno vladati svojom voljom.

### **Član 26.** **(Čuvanje oružja i municije)**

- (1) Oružje i municija moraju se čuvati tako da nisu dostupni licu koje nije ovlašteno posjedovati ga, a naročito djeci, zaključani i odvojeni u metalnom ormaru, sefu ili sličnom spremištu koje se ne može otvoriti alatom uobičajene upotrebe.
- (2) Oružje i municija moraju se čuvati u stambenom ili drugom prostoru koji se nalaze u mjestu prebivališta, odnosno sjedišta vlasnika ili korisnika oružja i municije.
- (3) Vlasnik oružja i municije koji napušta mjesto prebivališta na vrijeme duže od godinu dana, a oružje i municiju koje se prema ovom Zakonu posjeduje na osnovu oružnog lista ne nosi sa sobom, dužan ga je predati na čuvanje licu koje ima oružni list za istu vrstu oružja ili ovlaštenom trgovcu oružjem.
- (4) Vlasnik oružja i municije dužan je u slučaju iz stava (3) ovog člana, o predaji oružja i municije na čuvanje obavijestiti nadležnu policijsku upravu u roku od osam dana od dana predaje.
- (5) Imaoci oružja, koji oružje drže na osnovu oružnog lista, dužni su da na poziv nadležne policijske uprave donesu oružje na pregled.

### **Član 27.** **(Zabrana nošenja oružja)**

- (1) Zabranjeno je nošenje vatrenog, vazdušnog i hladnog oružja na javnim, vjerskim i sportskim okupljanjima, u obrazovnim, zdravstvenim i drugim javnim institucijama, ugostiteljskim objektima i prostorima koji se koriste za pružanje ugostiteljskih usluga, kao i prostorima gdje je javno istaknuta zabrana nošenja oružja.
- (2) Odredba stava (1) ovog člana ne odnosi se na sportsko oružje, u slučaju kada se ono nosi radi takmičenja u gađanju.
- (3) Ukoliko se oružje nosi na nezabranjenim mjestima, ne smije biti nošeno na način kojim se može izazvati osjećaj fizičke ugroženosti, uznemirenosti ili negodovanje građana.
- (4) Van lovišta, odnosno strelišta, vatreno i vazdušno oružje mora se držati, odnosno nositi u futrolji i ne smije biti napunjeno.

**Član 28.**  
**(Davanje oružja na posluhu)**

- (1) Zabranjeno je davanje pištolja i revolvera na posluhu drugom licu.
- (2) Lovačko, sportsko i vazdušno oružje mogu se davati na posluhu licu koje ima oružni list za vrstu oružja koje se daje na posluhu.

**Član 29.**  
**(Nabavljanje oružja za pravna lica)**

- (1) Pravnim licima, izuzimajući streljačke organizacije i organizacije koje gazduju lovištima, nadležna policijska uprava može izdati odobrenje za nabavljanje i držanje oružja i municije za to oružje, samo ako su organizovane u skladu sa Zakonom o agencijama za zaštitu ljudi i imovine i uz prethodnu saglasnost Federalnog ministarstva unutrašnjih poslova.
- (2) Pravna lica dužna su da u roku od osam dana od dana izvršene nabavke oružje i municije o tome obavijeste nadležnu policijsku upravu, radi izdavanja odobrenja za držanje oružja i da vode evidenciju o nabavljenom oružju i municiji.

**Član 30.**  
**(Povjeravanje nošenja oružja i municije)**

- (1) Pravna lica koja drže oružje i municiju na osnovu člana 29. stav (1) ovog Zakona, mogu povjeriti nošenje tog oružja i municije samo licima koja obavljaju poslove zaštite i koja ispunjavaju uslove za nošenje oružja propisane ovim Zakonom i Zakonom o agencijama za zaštitu ljudi i imovine.
- (2) Lica iz stava (1) ovog člana, oružje i municiju koja im je povjerena, mogu nositi samo za vrijeme dok obavljaju poslove zaštite i isto ne smiju iznositi van objekta ili područja koje se obezbjeđuje ili čuva.
- (3) Izuzetno od odredbe stava (2) ovog člana, čuvari usjeva i šuma i čuvari lovišta i ribolovišta koji ne stanuju na području koje čuvaju, mogu iznositi oružje i van tog područja i nositi ga do svog mjesta stanovanja, a čuvari stada, kao i lica koja obezbjeđuju imovinu koja se prevozi ili prenosi, mogu nositi oružje prilikom obezbjeđenja te imovine, odnosno kad je to neophodno u vezi sa obezbjeđenjem te imovine.
- (4) Pravna lica iz stava (1) ovog člana, izdaju posebnu potvrdu licu kome povjeravaju oružje i o tome su dužni obavijestiti nadležnu policijsku upravu.
- (5) Obrazac i sadržaj obrasca potvrde iz stava (4) ovog člana, propisuje ministar, na prijedlog policijskog komesara.
- (6) Odgovorno lice kantonalnih organa državne službe, drugih kantonalnih organa i jedinica lokalne uprave na području Tuzlanskog kantona, dužno je postupiti po odredbama stavova (1), (2), (3) i (4) ovog člana.

**Član 31.**  
**(Davanje na posluhu sportskog oružja)**

- (1) Streljačke organizacije mogu davati na upotrebu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na strelištu i na drugom terenu određenom za vršenje vježbi gađanja, odnosno takmičenja u gađanju.
- (2) Ako se magacin oružja streljačke organizacije ne nalazi na strelištu, članovi streljačke organizacije moraju za nošenje oružja do strelišta ili do drugog terena određenog za vršenje vježbi gađanja, odnosno takmičenja u gađanju, imati potvrdu streljačke organizacije o vršenju vježbi

gađanja, odnosno takmičenja u gađanju. Ova potvrda važi samo za dane kada se vrši vježba gađanja, odnosno takmičenje u gađanju.

### **Član 32. (Davanje na posluđu lovačkog oružja)**

(1) Organizacija koja gazduje lovištem može, radi odstrela divljači, članovima domaćih i inostranih lovačkih organizacija, dati na posluđu lovačko oružje i municiju najduže osam dana, i to samo za lov u određenom lovištu, o čemu je dužna odmah, ili u roku od 48 sati, obavijestiti nadležnu policijsku upravu.

(2) Za oružje i municiju izdatu na posluđu u smislu stava (1) ovog člana, organizacija koja gazduje lovištem izdaje potvrdu za nošenje oružja i municije, o čemu vodi evidenciju.

(3) Lice kome je dato oružje i municija na posluđu prema odredbama stavova (1) i (2) ovog člana, ne smije iznositi oružje i municiju van lovišta kojim gazduje organizacija iz stava (1) ovog člana.

(4) Oružje i municiju, koje su dobili članovi domaćih i inostranih lovačkih organizacija na posluđu od organizacija iz stava (1) ovoga člana, dužni su isto vratiti sa neutrošenom količinom municije.

### **Član 33. (Postupanje u slučaju prestanka potrebe za daljnjim držanjem oružja i municije)**

(1) Državni organi i druga pravna lica kod kojih je iz bilo kojih razloga prestala potreba za daljnjim držanjem oružja i municije, obavijestit će o tome u roku od 30 dana nadležnu policijsku upravu na čijem području se oružje drži.

(2) Nadležna policijska uprava preuzet će oružje i preostalu municiju iz stava (1) ovog člana i postupit će u smislu odredaba člana 38. ovog Zakona.

(3) Streljački savez Tuzlanskog kantona preuzet će oružje od streljačke ili lovačke organizacije koja je prestala sa radom, te ga distribuirati drugim streljačkim ili lovačkim organizacijama koje su registrovane na području Tuzlanskog kantona.

### **Član 34. (Postupanje u slučaju nestanka ili krađe oružja i isprava o oružju)**

(1) Pravna i fizička lica koja drže i nose registrovano oružje i oružje koje je nabavljeno na osnovu odobrenja za nabavljanje oružja, koje nije registrovano u roku iz člana 17. stav (1) ovog Zakona, u slučaju nestanka ili krađe oružja i municije, dužni su prijaviti nestanak ili krađu oružja i municije odmah, a najkasnije u roku od 24 sata.

(2) Pravna i fizička lica, dužna su prijaviti nestanak ili krađu odobrenja za držanje oružja, oružnog lista i odobrenja za nabavljanje oružja odmah, a najkasnije u roku od 24 sata.

(3) Pravna i fizička lica, dužna su o vlastitom trošku u "Službenim novinama Federacije BiH" oglastiti nestanak isprava o oružju, osim odobrenja na nabavljanje oružja i municije.

(4) Prijave iz stavova (1) i (2) ovog člana podnose se nadležnoj policijskoj upravi prema mjestu događaja ili saznanja o nestanku ili krađi oružja i municije. U prijavi se moraju navesti okolnosti pod kojima su oružje i municija izgubljeni ili ukradeni, a koje su podnosiocu prijave poznati.

(5) Odgovorno lice kantonalnih organa državne službe, drugih kantonalnih organa i jedinica lokalne uprave na području Tuzlanskog kantona, dužno je postupiti po odredbama stavova (1), (2), (3) i (4) ovog člana.

**Član 35.**  
**(Pronalazak oružja ili municije)**

Ko nađe oružje ili municiju ili sazna za sakriveno oružje ili municiju, dužan je o tome odmah obavijestiti najbližu policijsku upravu.

**Član 36.**  
**(Obaveza prijave promjene prebivališta)**

Imalac oružnog lista, odnosno odobrenja za držanje oružja, koji promijeni prebivalište, odnosno sjedište, dužan je da u roku od 30 dana od dana nastale promjene prijaviti nadležnoj policijskoj upravi na čijem području je novo prebivalište, odnosno sjedište tog imao, radi upisa u evidenciju o izdatim oružnim listovima, odnosno o izdatim odobrenjima za držanje oružja.

**Član 37.**  
**(Dotrajalo oružje)**

(1) Imalac oružja čije je oružje dotrajalo u tolikoj mjeri da njegova upotreba može ugroziti bezbjednost ljudi, a ne postoji mogućnost da se oružje popravi ili prepravi, dužan je takvo oružje predati nadležnoj policijskoj upravi i podnijeti zahtjev da se briše iz evidencije o nabavljenom oružju.

(2) Oružje iz stava (1) ovog člana prima se uz izjavu stranke datu na zapisnik, da se oružje predaje bez naknade.

(3) Sa zamijenjenim tehnički neispravnim dijelovima vatrenog i vazdušnog oružja postupa se u skladu sa stavovima (1) i (2) ovog člana.

## **TREĆI DIO - ODUZIMANJE ORUŽJA I MUNICIJE**

**Član 38.**  
**(Oduzimanje registrovanog oružja i municije)**

(1) Oružje i municija, kao i oružni list, odnosno odobrenje za držanje oružja, oduzet će se ako nastupi neki od razloga iz člana 20. stav (2) tačke b), c), d) i e) i stava (3) tačka a), člana 22. stav (2), kao i u slučajevima iz člana 11. stav (8) ovog Zakona.

(2) U slučajevima iz stava (1) ovog člana može se oduzeti i trofejno oružje, kao i staro vatreno oružje.

(3) Protiv rješenja o oduzimanju nadležne policijske uprave iz stavova (1) i (2) ovog člana, može se izjaviti žalba Ministarstvu u roku od 15 dana od dana prijema rješenja.

(4) Protiv konačnog rješenja iz stava (3) ovog člana, može se voditi upravni spor.

**Član 39.**  
**(Oduzimanje neregistrovanog oružja i municije)**

(1) Nadležna policijska uprava rješenjem će oduzeti oružje i municiju od pojedinca, državnih organa i drugih pravnih lica koji nabave oružje ili municiju bez propisanog odobrenja za nabavljanje ili držanje oružja bez oružnog lista, odnosno bez propisanog odobrenja za držanje.

(2) Protiv konačnog rješenja iz stava (1) ovog člana ne može se voditi upravni spor.

(3) Oružje i municija po odredbi stava (1) ovog člana oduzimaju se bez prava naknade i isto se uništava u skladu sa odredbama člana 40. stavovi (4) i (5).

**Član 40.**  
**(Postupak sa oduzetim oružjem)**

(1) Oduzimanje odnosno preuzimanje oružja, municije i oružnog lista, odnosno odobrenja za držanje oružja po odredbama člana 11. stav (8), člana 37. stavovi (1) i (2) i člana 38. ovog Zakona, vrši nadležna policijska uprava.

(2) Za oduzeto oružje, municiju i oružni list, odnosno odobrenje za držanje trofejnog oružja, izdaje se potvrda.

(3) Po pravosnažnosti rješenja o oduzimanju oružja i municije iz člana 38. Zakona, nadležna policijska uprava pozvat će imaooca oružja da u roku od šest mjeseci nađe kupca za oduzeto oružje i municiju. Ako imalac u propisanom roku ne nađe kupca, oduzeto oružje i municija bit će uništeno.

(4) Postupak uništenja oduzetog oružja i municije sprovodi posebna komisija koju obrazuje ministar, na prijedlog policijskog komesara.

(5) Komisija iz stava (4) ovog člana, o uništenju oduzetog oružja i municije sačinjava zapisnik koji se ulaže u spis.

**ČETVRTI DIO - PROMET ORUŽJA I MUNICIJE NA MALO**

**Član 41.**  
**(Pravna lica ovlaštena za promet oružjem i municijom na malo)**

(1) Prometom oružja i municije mogu se baviti pravna lica kod kojih je promet oružja i municije registrovan kao jedna od djelatnosti kojom se one bave.

(2) Pravna lica iz stava (1) ovog člana dužna su, da u roku od osam dana od dana registracije, obavijeste nadležnu policijsku upravu da su registrovana za djelatnost prometa oružja i municije.

(3) U pravnim licima iz stava (1) ovog člana poslove i zadatke prometa oružja i municije može obavljati samo punoljetno lice koje ispunjava uslove propisane članom 20. stav (2) tačke c), d) i e) i stav (3) ovog Zakona.

**Član 42.**  
**(Prodaja oružja i municije na malo)**

(1) Pravna lica iz člana 41. ovog Zakona mogu prodavati oružje i municiju samo organima, pravnim licima i pojedincima koji imaju odobrenje za nabavljanje oružja i municije.

(2) Pravna lica iz člana 41. ovog zakona dužna su da:

a) prilikom prodaje oružja i municije zadrže jedan primjerak odobrenja za nabavljanje oružja i municije, a na drugi primjerak stave zabilješku o izvršenoj prodaji i ovjere je štambiljem i potpisom odgovornog lica i

b) u roku od pet dana od dana prodaje o tome pismeno obavijeste nadležnu policijsku upravu koja je izdala odobrenje za nabavljanje oružja i municije.

(3) Pravna lica iz člana 41. ovog Zakona mogu pojedincima, koji imaju oružni list za lovačko oružje sa neolučenim cijevima ili za vazdušno oružje, prodavati municiju na osnovu oružnog lista koji je izdat za to oružje.

**Član 43.**  
**(Evidencija o nabavljenom i prodatom oružju i municiji)**

(1) Pravna lica iz člana 41. ovog Zakona dužna su da vode evidenciju o nabavljenom i prodatom oružju i municiji.

(2) Evidencija o prometu oružja i municije vodi se u knjigama evidencije po vrstama oružja i municije.

**Član 44.**  
**(Čuvanje i držanje oružja od strane pravnih lica)**

Pravna lica koja se bave prometom oružja i municije, kao i pravna lica koja drže oružje i municiju na osnovu ovog Zakona, dužni su da oružje i municiju drže i čuvaju u skladu sa ovim Zakonom i drugim propisima.

**Član 45.**  
**(Propisi o smještaju i čuvanju oružja i municije i obaveznim evidencijama)**

Bliže propise o smještaju i čuvanju oružja, o vođenju evidencije o nabavljenom oružju i municiji, vođenju evidencije o prometu oružja i municije i vođenju evidencije o potvrdama za nošenje oružja i municije, izdatih od strane organizacije koja gazduje lovištem, kao i obrascima i sadržaju obrazaca za vođenje tih evidencija, donosi ministar, na prijedlog policijskog komesara.

**PETI DIO – POPRAVLJANJE I PREPRAVLJANJE ORUŽJA MUNICIJE**

**Član 46.**  
**(Pravna lica i obrtnici ovlašteni za popravlanje i prepravlanje oružja)**

(1) Popravljajem i prepravljajem oružja mogu se baviti pravna lica i obrtnici, koji su registrovani da se bave popravljajem i prepravljajem oružja, ili je popravlanje i prepravlanje oružja registrovano kao jedna od djelatnosti kojom se oni bave.

(2) Pravna lica i obrtnici iz stava (1) ovog člana dužni su da u roku od osam dana od dana registracije obavijeste nadležnu policijsku upravu da su registrovani za popravlanje i prepravlanje oružja.

(3) U pravnom licu i kod obrtnika iz stava (1) ovog člana popravlanje i prepravlanje oružja može obavljati samo punoljetno lice koje ispunjava uslove propisane članom 20. stav (2) tačke c), d) i e) i stav (3) ovog Zakona.

**Član 47.**  
**(Oružje koje može biti predmet popravljanja i prepravljanja)**

Pravno lice i obrtnik iz člana 46. ovog Zakona mogu primiti radi popravljanja i prepravljanja samo oružje za koje je izdat oružni list, odnosno odobrenje za držanje oružja ili odobrenje za nabavljanje oružja.

**Član 48.**  
**(Evidencija i propisi o načinu vođenja evidencija)**

(1) Pravno lice i obrtnik koji se bave popravljanjem i prepravljanjem oružja dužni su voditi evidenciju o popravljenom i prepravljenom oružju.

(2) Bliže propise o načinu vođenja evidencije o popravljanom i prepravljenom oružju i obrascima i sadržaju obrazaca o vođenju ove evidencije, donosi ministar, na prijedlog policijskog komesara.

**ŠESTI DIO - NADZOR**

**Član 49.**  
**(Nadzor koji provode nadležne policijske uprave)**

Nadležne policijske uprave, ako Zakonom nije drugačije određeno, vrše neposredni nadzor nad prometom, držanjem i nošenjem oružja i municije, nad čuvanjem i smještajem oružja i municije od strane pravnih lica koja se bave prometom oružja i municije, streljačkih organizacija, organizacija koje gazduju lovištem i pravnih lica i obrtnika koji se bave popravljanjem i prepravljanjem oružja, kao i nadzor nad vođenjem evidencija, o:

- a) nabavljenom oružju i municiji,
- b) prometu oružja i municije,
- c) popravljenom i prepravljenom oružju i municiji,
- d) oružju i municiji datom na poslugu i
- e) oružju i municiji datom na čuvanje.

**Član 50.**  
**(Privremeno oduzimanje oružja, municije i oružnog lista)**

(1) Policijski službenici Ministarstva mogu od lica, za koje postoje osnovi sumnje da je izvršilo krivično djelo ili prekršaj određen ovim Zakonom, i sami privremeno oduzeti oružni list, kao i oružje, dijelove za oružje i municiju za koje postoje osnovi sumnje da je njima izvršeno krivično djelo ili prekršaj ili su pribavljeni krivičnim djelom ili prekršajem ili su nastali izvršenjem krivičnog djela ili prekršaja.

(2) Prilikom izvršavanja ovlaštenja propisanih u stavu (1) ovog člana, policijski službenici Ministarstva dužni su izdati potvrdu o privremeno oduzetim predmetima.

**Član 51.**  
**(Evidencija otisaka oružja)**

(1) Pravna i fizička lica koja imaju registrovano oružje na području Tuzlanskog kantona, dužni su omogućiti Ministarstvu uzimanje otisaka oružja (mehanički trag), radi unosa otiska u propisanu evidenciju.

(2) Ministarstvo će za obavljanje poslova iz stava (1) ovog člana, kao i za vođenje zbirki oružja i municije, sistematizovati posebno radno mjesto.

(3) Za uzimanje otisaka oružja iz stava (1) ovog člana ne naplaćuje se naknada.

(4) Odgovorno lice kantonalnih organa državne službe, drugih kantonalnih organa i jedinica lokalne uprave na području Tuzlanskog kantona, dužno je postupiti po odredbama stava (1) ovog člana.

## **SEDMI DIO - KAZNENE ODREDBE**

### **Član 52. (Krivična djela)**

(1) Kaznom zatvora od tri mjeseca do dvije godine, kaznit će se za krivično djelo, ko bez odobrenja nabavi, drži ili nosi vatreno oružje, dijelove za vatreno oružje ili municiju, kad je za nabavljanje tog oružja, dijelova za oružje i municiju potrebno odobrenje (član 9. stavovi (1), (2), (4), (5) i (6)).

(2) Za krivična djela iz stava (1) ovog člana, obavezno se izriče i mjera sigurnosti oduzimanja oružja, dijelova za oružje i municije.

### **Član 53. (Krivična djela)**

(1) Novčanom kaznom ili kaznom zatvora od tri mjeseca do jedne godine, kaznit će se za krivično djelo:

- a) ko prodava vatreno oružje, dijelove za vatreno oružje ili municiju pravnom licu ili pojedincu koji nemaju odobrenje za nabavljanje te vrste oružja (čl. 19. stav (1) i čl. 42. stav (1)) i
- b) ko drugom da pištolj ili revolver na poslugu (član 28. stav (1)), ili ko da na poslugu lovačko oružje licu koje za tu vrstu oružja nema oružni list (član 28. stav (2)).

(2) Za krivična djela iz stava (1) ovog člana, obavezno se izriče i mjera sigurnosti oduzimanja oružja, dijelova za oružje i municije.

(3) U izvršenju sigurnosne mjere iz stava (2) ovog člana za krivično djelo iz stava (1) tačke a) i b) ovog člana oduzima se oružni list.

### **Član 54. (Novčane kazne i zaštitne mjere za fizička lica za prekršaje)**

(1) Novčanom kaznom od 300,00 KM do 1.500,00 KM kaznit će se za prekršaj:

- a) ko nabavi, drži ili nosi gasno oružje, izuzev spreja za omaljivanje, ili hladno oružje (član 10. stav (1) tačke h) i i)),
- b) ko nabavi, drži, nosi, prodava ili da na poslugu vazdušno oružje ili dijelove za vazdušno oružje bez odobrenja (član 9. stavovi (1) i (2)),
- c) ko skuplja staro oružje bez odobrenja (član 13. stav (2)) ili ko upotrebljava staro oružje kao oružje ili nabavlja, spravljava ili drži municiju za ovo oružje (član 13. stav (3)), kao i imalac starog oružja koji to oružje ne prijavi nadležnoj policijskoj upravi (član 13. stav (4)) i
- d) ko postupi protivno odredbama člana 27. stav (1) ovog Zakona.

(2) Za prekršaj iz stava (1) tačke a), b), c) i d) ovog člana, pored novčane kazne, obavezno se izriče i zaštitna mjera oduzimanja oružja, dijelova za oružje i municije.

(3) U izvršenju zaštitne mjere iz stava (2) ovog člana oduzima se oružni list.

### **Član 55. (Novčane kazne i zaštitne mjere za fizička lica za prekršaje)**

(1) Novčanom kaznom od 200,00 KM do 1.000,00 KM, kaznit će se za prekršaj:



a) ko zamijenjene tehnički ispravne dijelove vatrenog i vazdušnog oružja, koji se označavaju fabričkim brojem, ne preda nadležnoj policijskoj upravi (član 9. stav (3)),

b) ko drži ili nosi oružje bez oružnog lista kad je za držanje ili nošenje tog oružja potreban oružni list ili ko na zahtjev policijskog službenika i drugog ovlaštenog službenog lica Ministarstva ne omogući uvid u to oružje ili oružni list (član 11. stav (2)),

c) ko bez odobrenja drži trofejno oružje, ili ga nosi ili upotrebljava, ili za ovo oružje drži ili nabavlja municiju (član 12. stavovi (1) i (2)),

d) ko nabavi, drži i nosi oružje za signalizaciju i oružje za uspavlivanje životinja, protivno odredbama člana 14. stavovi (1), (3), (4), (5), (6) i (7) ovog Zakona,

e) ko upotrijebi sprej za omamljivanje, suprotno odredbama člana 14. stav (2) ovog Zakona,

f) ko u određenom roku ne prijavi nabavku snajpera (član 15. stav (1)), ili ko u određenom roku ne prijavi otuđenje, nestanak ili gubljenje snajpera (član 15. stav (2)),

g) ko ne preda na čuvanje nadležnoj policijskoj upravi oružje, oružni list, odnosno dozvolu za držanje trofejnog oružja i municije u slučaju smrti imaoca oružja (član 16. stav (1)),

h) ko u propisanom roku ne podnese pismeni zahtjev nadležnoj policijskoj upravi za registraciju oružja i izdavanje oružnog lista (član 17. stav (1)), odnosno ko u propisanom roku ne vrati odobrenje za nabavljanje oružja (član 17. stav (2)),

i) ko u propisanom roku ne prijavi zamjenu vatrenog oružja (član 18. stav (2)),

j) ko u propisanom roku ne prijavi prenos prava svojine na vatrenom i vazdušnom oružju (član 19. stav (2)),

k) ko postupi protivno odredbama člana 25. ovog Zakona,

l) ko postupi protivno odredbama člana 26. ovog Zakona,

m) ko nosi oružje ili municiju koji su mu povjereni u vrijeme kada ne vrši službu, ili iznese oružje i municiju van područja, odnosno objekta koji se obezbjeđuje ili čuva (član 30. stav (2)),

n) član streljačke organizacije koji nosi oružje van strelišta ili drugog terena određenog za vršenje vježbi gađanja, odnosno takmičenja u gađanju, bez potvrde streljačke organizacije o vršenju vježbi gađanja, odnosno takmičenja u gađanju (član 31. stav (2)),

o) ko ne vrati organizaciji koja gazduje lovištem oružje, odnosno neutrošenu količinu municije dobijenu na posluhu u određenom roku ili ih upotrebljava, odnosno iznosi van određenog lovišta (član 32.),

p) ko ne prijavi gubitak ili krađu oružja ili municije koje drži na osnovu oružnog lista ili na osnovu odobrenja za držanje oružja (član 34. stavovi (1) i (2)),

q) ko u propisanom roku ne prijavi promjenu prebivališta radi evidentiranja oružja (član 36.),

r) ko postupi protivno odredbama člana 37. stavovi (1) i (3) ovog Zakona i

s) ko ne omogući Ministarstvu uzimanje otisaka oružja (mehanički trag), radi unosa otiska u propisanu evidenciju (član 51. stav (1)).

(2) Za prekršaje iz stava (1) tačke b), c), d) e), f), g), h), i), j), k), l) i r) ovog člana, pored predviđene novčane kazne, obavezno se izriče i zaštitna mjera oduzimanja oružja, kao i zaštitna mjera oduzimanja snajpera.

(3) U izvršenju zaštitne mjere iz stava (2) ovog člana oduzima se municija, oružni list, odnosno odobrenje za držanje trofejnog oružja.

## Član 56.

### **(Novčane kazne i zaštitne mjere za prekršaje pravnim licima i obrtnicima ovlaštenim za popravljavanje i prepravljavanje oružja)**

(1) Novčanom kaznom od 3.000,00 KM do 15.000,00 KM, kaznit će se za prekršaj:

- a) pravna lica koja u određenom roku ne prijave nabavku snajpera (član 15. stav (1)), ili koja u određenom roku ne prijave otuđenje, nestanak ili gubljenje snajpera (član 15. stav (2)),

- b) pravna lica koja u propisanom roku ne podnesu pismeni zahtjev nadležnoj policijskoj upravi za registraciju oružja i municije (član 17. stav (1)), koja u propisanom roku ne vrate odobrenje za nabavljanje oružja i municije (član 17. stav (2)), odnosno ne vode evidenciju o nabavljenom oružju i municiji (član 29. stav (2)),
- c) pravna lica koja u određenom roku ne prijave prenos prava svojine na oružju nadležnoj policijskoj upravi (član 19.),
- d) pravna lica koja povjere nošenje oružja i municije licu koje nije određeno da neposredno vrši poslove zaštite i koje ne ispunjava uslove za nošenje oružja propisane ovim Zakonom (član 30. stav (1)) ili koje naredi ili dozvoli da lice kome je povjereno oružje radi vršenja poslova zaštite nosi to oružje suprotno odredbama člana 30. stavovi (2) i (3) ovog Zakona, odnosno koja ne obavijeste nadležnu policijsku upravu o licu kojem je povjerila oružje (član 30. stav (4)),
- e) streljačka organizacija koja da na upotrebu oružje i municiju licu koje nije njen član, ili da oružje i municiju svom članu suprotno odredbama člana 31. ovog Zakona,
- f) pravno lice koje gazduje lovištem ako postupi suprotno odredbama člana 32. stavovi (1) i (2) ovog Zakona,
- g) pravno lice koje ne obavijesti u propisanom roku nadležnu policijsku upravu o prestanku potrebe za daljnjim držanjem oružja i municije (član 33. stav (1)),
- h) pravno lice koje ne prijavi u propisanom roku nestanak oružja koje drži na osnovu odobrenja za držanje, kao i nestanak municije (član 34. stavovi (1) i (2)),
- i) pravno lice koje ne preda oružje koje je dotrajalo u tolikoj mjeri da njegova upotreba može ugroziti bezbjednost ljudi, a koje se ne može popraviti ili prepraviti ili ne preda zamijenjene tehnički neispravne dijelove vatrenog ili vazdušnog oružja (član 37. stavovi (1) i (3)),
- j) pravna lica koja se bave prometom oružja i municije protivno odredbama člana 41. ovog Zakona,
- k) pravna lica koja se bave prometom oružja i municije ako postupe protivno odredbama člana 42. stavovi (2) i (3) ovog Zakona,
- l) pravna lica koja se bave prometom oružja i municije ako ne vode evidenciju o nabavljenom i prodatom oružju i municiji, ili je ne vode u knjigama evidencije po vrstama oružja i municije (član 43.),
- m) pravna lica koja ne drže ili ne čuvaju oružje i municiju na propisan način (član 44.),
- n) pravna lica koja se bave popravljanjem i prepravljanjem oružja protivno odredbama člana 46. ovog Zakona,
- o) pravna lica koja prime na popravljnje ili prepravljnje oružje za koje nije izdat oružni list ili odobrenje za nabavljanje i držanje oružja (član 47.),
- p) pravna lica koja se bave popravljnjem i prepravljnjem oružja ako ne vode evidenciju o popravljenom i prepravljjenom oružju, ili je ne vode na propisanom obrascu (član 48.) i
- q) ko ne omogući Ministarstvu uzimanje otisaka oružja (mehanički trag) radi unosa otiska u propisanu evidenciju (član 51. stav (1)).

(2) Za prekršaje iz stava (1) ovog člana kaznit će se novčanom kaznom od 300,00 KM do 1.500,00 KM i odgovorno lice u pravnom licu, u kantonalnim organima državne službe, drugim kantonalnim organima, jedinicama lokalne uprave i obrtnici.

(3) Pored novčane kazne, za prekršaj iz stava (1) tačke a), c), g), i), m) i o) ovog člana izreći će se i zaštitna mjera oduzimanja predmeta, a za prekršaje iz stava (1) tačke j), n), o) i p) izreći će se i zaštitna mjera zabrane vršenja djelatnosti do šest mjeseci.

## OSMI DIO – PRELAZNE I ZAVRŠNE ODREDBE

### Član 57. (Prijava nelegalnog oružja)

(1) Lice koje nelegalno posjeduje oružje, dužno je posjedovanje takvog oružja prijaviti najbližoj policijskoj upravi, radi predaje ili onesposobljavanja.

(2) Policijski službenici će preuzeti oružje i municiju iz stava (1) ovog člana, na mjestu na kome se ono nalazi.

(3) Policijski službenici će o preuzetom oružju i municiji iz stava (2) ovog člana, izdati potvrdu.

(4) Ako lice želi onesposobiti oružje iz stava (1) ovog člana, dužno je podnijeti nadležnoj policijskoj upravi zahtjev za onesposobljavanje oružja, u roku od osam dana od dana predaje oružja.

(5) Troškove onesposobljavanja oružja snosi podnosilac zahtjeva.

(6) Ako lice postupi u skladu sa stavom (1) ovog člana, a prije istražnih radnji policije, u skladu sa Zakonom o prekršajima i započinjanju istrage krivičnog dijela, te hitnih istražnih radnji u skladu sa Zakonom o krivičnom postupku, odnosno početkom primjene policijskih ovlaštenja utvrđenih Zakonom o policijskim službnicima Tuzlanskog kantona, neće se pokretati prekršajni, niti krivični postupak.

### Član 58. (Provedbeni propisi)

U roku od tri mjeseca od dana stupanja na snagu ovog Zakona, ministar će, na prijedlog policijskog komesara, donijeti propise o:

- a) evidencijama koje se vode u Ministarstvu u vezi sa nabavljanjem, držanjem i nošenjem oružja, obrasce, sadržaj obrazaca i način vođenja tih evidencija,
- b) načinu vođenja evidencije o popravljenom i prepravljenom oružju i obrascima i sadržaju obrazaca za vođenje ove evidencije,
- c) obrascu i sadržaju obrasca oružnog lista,
- d) obrascu i sadržaju obrasca potvrde koju državni organi i druga pravna lica izdaju licu kome povjeravaju oružje i municiju, obrascu i sadržaju knjige o primopredaji oružja i municije i obrascu i sadržaju evidencije o potvrdama za nošenje oružja i municije izdatih od organizacije koja gazduje lovištem,
- e) smještanju i čuvanju oružja i municije, vođenju evidencije o nabavljenom oružju i municiji, vođenju evidencije o prometu oružja i municije i obrascima i sadržaju obrazaca za vođenje tih evidencija,
- f) obrascu i sadržaju evidencije o predatom oružju na čuvanje i
- g) programu obuke i načinu osposobljavanja za pravilno rukovanje, držanje i nošenje kratkog vatrenog oružja.

### Član 59. (Zamjena oružnih listova izdatih od strane nadležnih organa u Bosni i Hercegovini po ranijem zakonodavstvu)

- (1) Lica koja u trenutku stupanja na snagu ovog Zakona imaju oružni list, bez obzira na datum njegovog izdavanja od strane nadležnog organa u Bosni i Hercegovini, dužna su u roku od tri godine od dana stupanja na snagu ovog Zakona, podnijeti zahtjev za zamjenu oružnog lista nadležnoj policijskoj upravi.

- (2) Postupak iz stava (1) ovog člana provodi se u skladu sa članom 11. stav (7) ovog Zakona.
- (3) Ukoliko lice ne postupi u skladu sa stavom (1) ovog člana, primjeniće se odredbe člana 11. stav (8) ovog Zakona.

**Član 60.**  
**(Primjena odredbi člana 23. ovog Zakona)**

Odredbe člana 23. ovog Zakona ne odnose se na lica koja imaju registrovano oružje prije stupanja na snagu ovog Zakona.

**Član 61.**  
**(Primjena Zakona o agencijama za zaštitu ljudi i imovine)**

U odnosu na pravna lica koja obavljaju poslove fizičke i tehničke zaštite, odredbe ovog Zakona primjenjuju se, ukoliko nisu u suprotnosti sa Zakonom o agencijama za zaštitu ljudi i imovine.

**Član 62.**  
**(Ravnopravnost spolova)**

Gramatička terminologija u ovom Zakonu podrazumijeva uključivanje oba spola.

**Član 63.**  
**(Prestanak važenja)**

Danom stupanja na snagu ovog Zakona prestaje primjena Zakona o nabavljanju, držanju i nošenju oružja i municije (Prečišćeni tekst "Službeni list SR BiH", broj: 42/90 i "Službene novine R BiH", br. 13/93 i 13/94).

**Član 64.**  
**(Stupanje na snagu)**

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

B o s n a i H e r c e g o v i n a  
- Federacija Bosne i Hercegovine -  
T U Z L A N S K I K A N T O N  
S k u p š t i n a  
Broj: 01-02-315-11/08  
Tuzla, 26.11.2008. godine

Predsjednik  
Skupštine Tuzlanskog kantona,  
  
Mr. sci. Amir Fazlić